



Tir Yimiyim

www.tirymiyim.in

Regd. No. RNI. NAGAAO/2004/13113. Postal-NE/RN-717.

e-mail : tirymiyim@gmail.com

TAPAK 8

Yangia anidakangma : Tir Yimiyim

tirymiyim@aolima

tir yimiyim

TAPAK 3



Taliban lenirtemi yimden yimsüsüba dak ajemdaker ken o bentetner

Assam CM Himanta-i bulldozer amshia mozütem raksaa endok



VOL. XVIII NO. 275 (ADOK 275)

DIMAPUR

TENTONÜ (MONDAY)

CHITENI (JULY) 19, 2021

₹ 5.00

RPP-i Nagaland sorkar aitsür

Dimapur, July 18, 2021 (TYO): State sorkari vaccine magirtem mesüra anogo 15 shia COVID-19 negative test report magütsüba sorkar mapa inyaker nem itasen magütsütsü sangdongba aitsür, ta Rising People's Party (RPP)-i metetdaksüo.

Meghalaya High Court-i June 24, 2021 nü tashiyim agi vaccine agidaksüba ni sung ka temeten anema lir ta tetuyuba ka agütsüo. Anungji Nagaland sorkari iba tangatetba alema inyaker, ta parnokisa ashi.

India ama democracy linük ka nung iba ama nungdak maliba tashiyim mapa inyaksü memelar anungji Chief Secretary-i iba sangdong meyipa agütsü ayongzüker, ta RPP-isa ashi.

"Sorkar mapa inyaker nisung lakh aika dang pei sasa anogo 15 shia TrueNat/RT-PCR/CBNAAT test asütsü tuyuba

dang nungibo sorkari pei mapa inyakertem angati tendangdaksütsüla" ta RPP President Joel Naga aser General Secretary Amai Chingkhü nati sangdong nung ashi.

State sorkari mapa inyakertem asoshi COVID testing facility balaka lapoktsüla, ta parnokisa metetdaksü.

"Sorkar mapa inyakertemi anogo 15 shia Covid-19 tendangtsüla ta July 17, 2021 sangdong nung Nagaland sorkari metetdaksüo aser iba ya tim masüba inyakyim ajanga sorkari sen arulen bushiba ama temolung malemer. Iba ya tashiyim agi sen saruba kir. State sorkari totzü nung cess agiba ajanga aibelen tulu inyakba sülen ano tang sorkari par mapa inyakertem dang nungi sen agütsü meranger" ta Rising People's Party (RPP)-isa metetdaksü.

COVID-19 Nagaland: Nisung 106 dak putet; 4 asü

Kohima, July 1, 2021 (TYO): Deobarnü Nagaland nung nisung 106 dak COVID-19 putet aser parnok züngsema nisung ajak agi 26,682 kümogo. Maneni, tanü COVID-19 puteta alir nisung 4 asüba züngsema tasür ajak agi 528 kümogo.

"Tanü nisung 106 dak COVID-19 putet. Parnokji Dimapur nung 39, Kohima nung 33, Mokokchung nung 15, Phek nung 7, Longleng nung 6, Peren nung 4 aser Tuensang o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Deobarnü COVID-19 puteta alir nisung 56 taneptsü angu. Parnokji Mokokchung nung 15, Dimapur nung 11, Wokha nung 10, Kohima nung 6, Peren nung

5, Kiphire nung 4, Phek nung 3 aser Longleng nung 2 lir. Parnok züngsema taneptsü angur ajak agi nisung 24,261 kümogo" ta paisa metetdaksü.

Nagaland nung COVID-19 nungi taneptsü angur 90.93% lir aser tang nisung 1,149 anepaludar, ta paisa shisem.

"Deobarnü COVID-19 puteta alir nisung 4 asü. Parnokji Kohima nung ana aser Dimapur p Mokokchung nung kaka liasü. Parnok züngsema tasür ajak agi 528 kümogo saka nisung 14 bo tanga tashidak ajanga asü," ta Dr Kikon-isa ashi.

Nagaland nung COVID-19 alitsü akok ta temolung melemi bilemba sample 2,46,396 tendang. RT-PCR ajanga 1,00,573, TrueNat ajanga 65,180 aser Rapid Antigen Test

ajanga 80,643 tendang, ta Dr Kikon-isa metetdaksü.

"Honibar tashi nung nisung 5,49,252 nem COVID-19 vaccine indang dose 6,64,906 agütsüo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,480, healthcare workers 15,882, arishi küm 45 ser tempur 1,70,950 aser arishi küm 18 nungi 44 tsüngda alir 3,01,940 lir, ta paisa metetdaksü.

"Vaccine agirtem rongnungi nisung 1,15,654-i dose anaprong agiogo. Parnokji frontline workers 34,811, healthcare workers 11,622, arishi küm 45 ser tempur 69,071 aser arishi küm 18 nungi 44 tsüngda alir 150 lir, ta Dr Thurr-isa ashi.

Ao Senso Telongjem Dimapur-i metetdaksür

Dimapur, July 18, 2021 (TYO): Naga Council Dimapur dak sendakba ken o ka atema Ao Senso Telongjem Dimapur (ASTD) aser T Bangerloba tsüngda mepetmesü ka adoka aliba angatettepogo.

July 19, 2020 nü ASTD-i Bangerloba den amalitep kecha malir ta sangdong ka nung

metetdaksa liasü saka July 17, 2021 nü Bangerloba aser ASTD Sanen Luden telongjem mensem ka amendang tangatettep kati aruogo.

Yashi senden nung tatsü-talang ajak jembitepba sülen T Bangerloba aser ASTD amalitepa yaritepa aotsü telemetba agiogo ta sangdong ka nung metetdaksü.

NPCC-i Nagaland MLA ajak anentsü ayongzüker

Dimapur, July 18, 2021 (TYO): Naga yimten latettsü atema Nagaland Assembly nung MLA 60 prong anentsüla ta Nagaland Pradesh Congress Committee (NPCC)-i metetdaksüo.

"Parnoki menden yutsüba ajanga yimten tebilemstü angatetteptsü atema nendaka inyakba kuli agütsütsü" ta NPCC-i sangdong ka nung ashi.

Nagaland Governor aser Centre atema Interlocutor RN Ravi-i ashiba ama joko olemteptsü kecha mali, ta NPCC-

isa nenshia metetdaksü.

July 16 nü NPCC indang Political Affairs Committee (PAC) senden ka amendang Assam sorkar dang Assam Cattle Preservation Bill, 2021 magizütsü atema metetdaksü.

Iba Bill ajanga Assam den kidanger state tem nem timtem bentsür arutsü aser alemli nungi tesentaktep tajung aliba raksatsütsü, ta PAC-i ashi.

Maneni, Assam sorkari arrtsülen Central armed police forces (CAPFs) lia armed police

personnel mapa lemezütsüba ya tebilemstü khuret tulu ka lir. Assam aser Nagaland sorkartemi arrtsü mangatettep atema mapa tai inyaker, ta PAC-isa metetdaksü.

"Iba ken o ya Supreme Court nung benoka lir anungji Assam sorkari arrtsülen tensa meraksatsüla aser armed police personnel anientsüla. Talisa, mangatettep aliba tesemtem nung CAPFs lemezütsüba aliba ya Ministry of Home Affairs ketdangtsüba kübok asütsüla" ta NPCC-isa metetdaksü.

New Mexico nung July 19 nü 'Dr Jonathan Iralu Day' amongtsü

New Mexico, July 18 (Agencies): United States kübok New Mexico state nung July 19, 2021 nü Dr. Jonathan Iralu Day amongtsü telemetba agiogo.

Naga nung doctor Jonathan Iralu-i COVID-19 wara mapang mapa tajung inyakba atema tetushi agüja New Mexico state ajunga nung iba anogo amongtsü.

Dr. Jonathan Iralu ya Khonoma nung Dr Vichazelhu Iralu'er jabaso aser Dr Sievilie Iralu'er semchir lir. Pa tetsü ya America tsür lir.

"Dr. Jonathan Iralu ya Indian Health Service Chief Clinical Consultant for Infectious

Diseases lir aser New Mexico nung COVID-19 anema inyakba mapa nung pai shilem tajung agiogo" ta Governor Michelle Lujan Grisham aser Secretary of state Maggie Toulouse Oliver nati sign asüba kulikaket nung shia lir.

Pai New Mexico nung alirtem yarir aser 1994 nungi Gallup Indian Medical Center nung par nisungtem anepalud, ta kulikaket nungsa shia lir.

Dr. Iralu ya Harvard Medical School nunga instructor inyaker aser Boston, Massachusetts nung aliba Global Health Equity indang Brigham and Women's Hospital Division nung senior physician lir.

Assam-i arur ajak negative COVID report alitsüla

Guwahati, July 18, 2021 (Agencies): Tangalen nungi Assam-i arur ajak dang COVID-19 tendangtsü aser iba nung COVID-19 vaccine indang dose anaprong agirtem dena lir, ta Deobarnü health ketdangtsür kati ashi.

Tesüiba anogo 5 tsüngda COVID-19 puteteter rongnung vaccine indang dose anaprong agir 5% liasü aser iba jagi tarur ajak tendangtsü telemetba agiogo, ta ketdangtsürisa ashi. "Vaccine indang dose anaprong

agir dak-a COVID putetogo anungji taoba mapang parnok metendangtsü ta sangdongba meyipa agir" ta Assam Health & Family Welfare department-i metetdaksü.

"COVID-19 vaccine indang dose anaprong agiria virus menar. Parnok dak shirangba yimya balaka mali saka parnok ajanga belenshütsü akok" ta National Health Mission (NHM), Assam Director, Dr Lakshmanan S-i ashi.

Daldali Reserved Forest nung ali agütsüba aitsür: UNTABA

Dimapur, July 18, 2021 (TYO): Daldali Reserve Forest nung Assam Police battalion aser Training Centre lapoktsü atema ali agütsüba ajanga arrtsülen alirtem tsüngda meputep adoktsü, ta United Naga Tribes Association of Border Areas (UNTABA)-i metetdaksüo.

Karbi Anglong Autonomous District Council (KAADC)-i Indisen, Aoyimkum aser Rangapahar Army Cantonment tesem anasa aliba Daldali Reserved Forest nung alu tulu ka Assam sorkar nem tenla agütsüo, ta UNTABA-i ashi.

Item tesem madak kiburji Naga nung lir aser taoba British India Government-i ketdangtsü zübatstü atema Nagaon district nem agütsüba liasü, ta UNTABA president Hukavi T Yeputhomi aser general secretary Imsumongba Pongen nati sangdong ka nung ashi.

"Assam sorkari state arrtsü anasa armed police battalions amenoktsü telemetba agiogo saka Nagaland sorkaribo border observation posts kar aliba nung nübo talila bendenloksü atema ang lemtetogo. Iba ajanga Nagaland sorkari arrtsü ken o nung temolung magütsüba sayur" ta UNTABA-i ashi.

Nagaland sorkari battalion tasen melapoktetra tang aliba battalion tem arrtsülen mapa lemezütsütsüla, ta parnokisa ashi.

"Nagaland aser Assam tsüngda 1972 aser 1979 nung interim agreement tem agiba meyipa repringshitsü atema chief minister jejang nung senden amentsü atema Nagaland sorkar dang ashir. Iba senden nung Assam den arrtsü aliba Naga nung li ajak nungi "Dispute Area Belt" (DAB) agientsü atema jembitsüla" ta UNTABA-isa metetdaksü.

Arrtsülen paramilitary forces (CRPF) mapa lemezütsüba aliba anientsüla aser civil o police administration nem ketdangtsütsü tashi agütsütsüla, ta parnokisa ashi.

Assam sorkari Supreme Court nung 'Civil Suit No. 2 of 1988' benokba meyipa agütsü atema Nagaland sorkari mapa inyaksü akhanger, kechiyong ibaji agien nung dang putiotsü kulitem nung ajemdaker state ana tsüngda arrtsü ladangtsü, ta UNTABA-isa metetdaksü.

Assam aser Nagaland tsüngda arrtsüji Upper Assam nung Golaghat nung aliba 'Dhodhar Ali' mesüra 'Naga Bund' nungi Daigurung ayong tashi aser idak nung jagi Kaliani ayong nungi Kopili ayong aser Barak ayong tashi lir. Nagaland aser Assam tsüngda putiotsü kulitem nung ajemdaker arrtsü ken o melemet tashi state ana tsüngda yimjung malitsü, ta UNTABA-isa ashi.

Covid-19 tashidak nokdangtsü atema senso shia teinyaktsü asem :



Tir Yimiyim

Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.



Nagaland nung teintet rogo 57,000 dang old age pension agir



National Senior Citizens Helpline, Nagaland chapter ajanga seminar ayongzükba sentong agiba noksa nung angur.

Kohima, Chiteni/July 18 (TYO): Nagaland nung senior citizens pension scheme teyari ya nisung 57,400 dang agir, koba item rogo nütsüng yongsük lakh ana dak tema aliba den medemdangra kanga ajema lir, ta ketdangsurtemi ashi.

Nagaland nung Central sorkar nungi agütsüba Indira Gandhi Old Age Pension Scheme (IGOAPS) teyari agir nisung 57,400 lir, aser item rongnung arishi küm 60 nungi 79 tsüngta nisung 51,750 aser arishi küm 80 nungi tema nisung 5,650 dang lir, ta Social Welfare Department nung Assistant Director, K Wango Langsym-i ashi.

Honibarnü National Senior Citizens Helpline, Nagaland chapter ajanga LCS Building nung anogo ka seminar ayongzükba sentong nung jembiba mapang, teinten rogo aika kidang kibong aser lokti nung timtem balala ajurur, saka teintet rogotem akumtsüba amshitsü temeden ya senmang ka ama lir aser parnok dak tim masüba mapa inyaka senzüka meyutsüsüla, koba Constitution nung Fundamental rights ka ama agüja lir, ta pai ashi.

"Teintet rogotem takum kumzükba ayutsü ya India indang Constitution nung mela lir. Article 41, Directive Principle of State Policy ajanga state dang rongsenketzüng akaba aser terenlok balala nung ajemdaker teintet rogotem nem teyari agütsütsü totuyuba agüja lir," ta pai ashi.

Parnok atema süoki ia bilema Central sorkari Maintenance & Welfare of Parents & Senior Citizens Act,

2007 aser National Policy on Older Persons ya yanglu, ta pai ashi.

Teintet rogotem asoshi teyari scheme balala agütsüba rongnung Indira Gandhi National Old Age Pension Scheme (IGNOAPS) ya ka lir, koba Ministry of Rural Development ajanga senotsü teyari agütsü aser Department of Social Welfare, Nagaland ajanga mapa kuma inyaker, ta Langsym-i ashi.

Pai ashiba agi, iba scheme kübok Below Poverty Line (BPL) kibong nungi arishi küm 60-79 tsüngta alir nem ita shia sen 200 aser arishi küm 80 tema alir nem ita shia sen 500 agütsür.

Social Welfare Department ajanga iba tajangzük angurtem ya timba kumdaktsüner, kechiaser Nagaland nung teintet rogo lakh ana dak tema aliba nungi tang iba tajangzük agir ya kanga ajema lir, ta ashi.

Iba teyari agütsü atema tongtipangtibaji bank account den Aadhaar sendaktepa alitsüla, anungjidang ministry ajanga Direct Transfer Benefit agütsür.

Ministry nungi aiben totuyuba agüjaka asenoki Public Financial Management System (PFMS) amshia senotsü teyari ya magütsütetsü, ta pai ashi.

Iba dak sendakba nung state sorkari Union Ministry dang Nagaland nung tajangzük angur timba kumdaktsütsü asoshi asüngdangogo, ta Langsym-i metetdaktsü.

Department ajanga state nung village council dang teintet rogotem Aadhaar aser bank account sendakteptsü ajungshir. Kobi melie department ajanga

tang iba tajangzük angurtem jangjashia aotsü aser sür alirtem melen nisung tasen yoktsü, ta pai metetdaktsü.

Langsym-isa ashiba agi, Annapurna Scheme kübok Food and Civil Supplies Department ajanga BPL senior citizen nem ita shia jang seret 10 agütsütsü ataja lir.

Kasa sentong nikongdang agiba mapang Panel Lawyer, Kohima District Legal Services Authority (KDLISA), Asenla Walling-i KDLISA ajanga teyari balala agütsüba indang jembiba liasü.

Legal Services Authority indang nükjidongji okadak ken o benoka jembiba kisüng masü saka nisung ka temeden atema shisatsü agütsüba dena lir, ta lai ashi.

Maneni Retainer Lawyer, KDLISA, Sunjib Rana ajanga "Maintenance and Welfare of Parents and Senior Citizens Act 2007" onük nung jembiba liasü.

Nagaland Senior Citizens Helpline ya November 2020 nung amenok, ta Program Manager NHSC Neithonuo Liegise ajanga ashi. Healthcare facility tajungba, talitsü tensa tajungba aser danga yimya balala tajungba akumba ajanga alima nung teintet rogotem nütsüng timba akumer, aser Nagaland nunga kasaji lir, ta lai ashi.

Technical timtem kar aliba ajanga Elder Line toll free no. 14567 ya tang tashi mamshiteli lir saka iba melen CK Arcade Building, First Floor, Opposite Head Office, Kohima, Nagaland nung amenoka aliba office nung 0370-2290278 ya amshir, ta laisa ashi.

Sovima village council-i süngdong atem

Dimapur, Chiteni/July 18 (TYO): Sovima Village Council ajanga Project Green Sovima tenzükba DFO, Dimapur den lungjemer July 17, 2021 anepdang süngdong atemba sentong ka agia liasü.

DFO Office, Dimapur nungi ketdangsurtem teyari aser lenisüba nung ICAI University lenmang nung süngdong tabu balala tejang 1000 shi tema



liasü.

Sovima village kübok khel toku nungi lanurtem nem ita ana melentepa hopta shi arem müreka süngdong anepalutsü nungloktsü.

DFO, Dimapur ajanga taoba ita Sovima village council nem süngdong 300 shi agütsü aser Honibarnep süngdong 1000 shi agütsü, aser iba atema parnok dang pelar, ta Chairman, Sovima village council ajanga ashi.

ATMA Kohima ajanga maparen balala inyaka arur

Dimapur, Chiteni/July 18 (TYO): ATMA Chunlikha block, Kohima district ajanga Yikhanyu yimtsüng nung July 9, 2021 nü Sugarcane cultivation and processing unit indang farm school ka tenzük, kong Sesinlo Kent ya farm teacher shim.

Iba sentong nung farm teacher nem pa indang shilem aser teinyaktsütem angatetdaktsü aser ATM Chenobu ajanga organic pest management indang jembiba aser ibaji amshia moji lu aser danga tsünütsü nung mesen aziüktsü indang sayua liasü.

Iba dak sendakba nung farm teacher yagi par indang alu amshia aluyimer dangar dang aluyimba indang shisatsü aser yimya balala angazükdaktsütsü.

ATMA Chunlikha block, Kohima district ajanga July 10, 2021 nü Kandinu yimtsüng nung

kholar tsünütsü indang yimyatem sayua liasü. Iba mapang ATM, Sinlo Khing ajanga aluyimer dang metsüjang yoktsü atema tim yimyatem sayua liasü. Maneni aluyimer dang kholar tsünüba yimyatem sayur aser kholar metsü lema agüja liasü.

ATMA Chunlikha block, Kohima district ajanga Nsunyu yimtsüng aser Tesophenyu yimtsüng nung July 8, 2021 aser July 12, 2021 anogotem nung azüngken (soybean) tsünütsü yimyatem sayua liasü.

ATM Sinlo Khing ajanga aluyimer dang tim yimya nung azüngken ali nung atemtsü, anepalutsü indang sayua liasü. Iba mapang FSG telok ka tentet aser iba telok dang azüngken tsünütsü yimyatem sayu aser azüngken jang lema agüja liasü.

COVID-19 tashidak wara liaka aluyimba metoktsür



Kohima village nungi wrestler tem Pele Khezhi'er alu nung tangokba angur.



Pele Khezhi'er alu nung Kohima village nungi nüburtem mo atemba angur.

Kohima, Chiteni/July 18 (TYO): COVID-19 wave mezüngbuba mapang tenük sünga alu rutetba tepela nung 1st Class contractor Pele Khezhi-i maneni tang tashidak wara agi aliba tesen ajanga sünger alidang aluyimba nung temolung agütsüshir.

Taoba küm COVID-19 tashidak jatetba mapang Dzü aser Kohima-Chakhabama lenmang nung par lui yimdaklirtem arua mo temja liasü, ta Nagaland Contractors' & Suppliers Union tir, Pele Khezhi-i ashi.

Alu junga aruba ajanga temolung nung tali ajungmeso, aser takumbo aluyimer den lanurtem alui yoktsü maangka yanglutsür aser akhi tetsü-tebou mapang nungi amshia aruba yimya angazükdaktsür, kong parnoki mo atema mapang kati ka yaritepa aru, ta pai ashi.

Saisapong nung tenokdangba lir asünung, saisaponger tema anogoshi temang atsüsaa exercise agiba ama aluyimba nung shilem agitetsü, ta Khezhi-i ashi.

Yamaji Kohima village nungi Naga nunger yimya nung melangteperitem rongnung taoba mapang NWA champions Kezhalelie Keretsu aser Menuosetuo Yiese nungera mo atemba nung yariteptsü asoshi arua liasü.

Parnoki aluyimba maparen nung shilem agiba ajanga aluyimer tali ajungmesotsü, ta pai ashi.

COVID-19 tashidak wara agi nisung aika molung raksatsür alitsü akok, saka aluyimba maparen maneni inyaker aser chiyongtsü peria bendentsü asoshi aluyimba nung temolung agütsüsüla, ta Khezhi-i par alu nung mo atemba mapang ashi.

Assam CM Himanta-i bulldozer amshia mozütem raksaa endok



Deobarnü özüngi memelaba mozü raksaba aser rongdokba noksa nung angur.

Guwahati, July 18, 2021 (Agencies):

Deobarnü Nagaon aser Hojai nung 'Seized Drug Disposal' indang sentong balala ana agidang Assam chief minister Himanta Biswa Sarma-i özüngi memelaba mozü aika raksaa endoktsüogo. Nagaon district kübok Barhampur playground nung agiba sentong nung Chief minister Sarma-i bulldozer ka ajanga mozütem menüngsa aser ano mozü aika rongdoktsü. "Anogo ana atongtepa Assam Police-i mozü alema

inyaka arudang apuba heroin seret 9.733, ganja seret 253.301, poium seret 977, cough syrup pongdang 78340 aser mozüjang 271904 tashi raksaa endokogo" ta Sarma-i Twitter nung metetdaksü. Anogo nung sorkari Rs 163.58 crore alangba mozütem raksaa endokogo, ta paisa ashi. "Rs 163.58 crore tema indang mozü apuba raksaa endokba ajanga mozü shibelenba maparen tulu inyakba kuli sayur. Iba nung GST magütsür aser rongsenketzüng

Mezüng anogo Golaghat aser Karbi Anglong kübok Diphu nung mozütem raksaa endoka liasü.

Deobarnü Nagaon nunga heroin seret 10, ganja seret 253, opium gram 977 aser narcotic tablets lakh 271904 raksaa endok. Hojai nung ganja seret 736.73, heroin gram 353.62 aser süngjang 45843 raksaa endok. "War On Drugs nung CM Himanta Biswa-i nungita yariba atema pelar" ta Assam Police-ia Twitter nung metetdaksüogo. "Assam sorkari drugs anema zero tolerance policy tenzüko aser Assam Police dang iba maparen anema akangkanga inyaksü tetuyuba agütsüogo," ta CM Sarma-isa metetdaksü.

nung tetsüdaksü tulu bentsür arur. North East India nung mozü shibelenba maparen samatsütsü atema onoki Manipur aser Mizoram sorkartem den yaritepa inyaker" ta CM Sarma-isa ashi.

Mezüng anogo Golaghat aser Karbi Anglong kübok Diphu nung mozütem raksaa endoka liasü.

Deobarnü Nagaon nunga heroin seret 10, ganja seret 253, opium gram 977 aser narcotic tablets lakh 271904 raksaa endok.

Hojai nung ganja seret 736.73, heroin gram 353.62 aser süngjang 45843 raksaa endok.

"War On Drugs nung CM Himanta Biswa-i nungita yariba atema pelar" ta Assam Police-ia Twitter nung metetdaksüogo.

"Assam sorkari drugs anema zero tolerance policy tenzüko aser Assam Police dang iba maparen anema akangkanga inyaksü tetuyuba agütsüogo," ta CM Sarma-isa metetdaksü.

Meghalaya: nisung 388 dak Covid putet; nisung trok asü

Shillong, July 18, 2021 (Agencies):

Tesüiba ghonda 24 tsüngda Meghalaya nung nisung 6 Covid ajanga asü aser nisung 388 dak Covid-19 putet. Deobarnü National Health Mission (NHM), Meghalaya ajanga sayaba Covid19 bulletin nung tashidak tasen puteter densema state nung Covid positive puteter nisung 57,388 kümogo. Tesüiba ghonda 24 tsüngda Covid-19 agi shiranger nisung

483 taneptsü nguogo aser parnok züngsema taneptsü angur ajak agi nisung 52,464 kümogo. Tang Meghalaya nung nisung 3,979 anepaludar aser state nung iba wara adoker külen nungi nisung 945 süogo. Honibarnü Meghalaya nung nisung 507 dak Covid-19 putet aser nisung 8 asü. Kasa anogo nisung 585 shi iba wara nungi taneptsü ngua liasü. Iba anogo state nung Covid agi shiranger

nisung 4,080 aküm. NHM Meghalaya data ajanga angazükba agi, Honibarnü nisung 8,756 nem Covid19 vaccine agütsü. Parnok rongnung nisung 4,981 shi arishi küm 18 nungi 44 tsüngda alirtem aser nisung 3,525 shi arishi küm 45 tema lir. Kasa anogo health care workers 88 aser frontline workers 162 nem vaccine agütsüogo.

nisung 4,080 aküm. NHM Meghalaya data ajanga angazükba agi, Honibarnü nisung 8,756 nem Covid19 vaccine agütsü. Parnok rongnung nisung 4,981 shi arishi küm 18 nungi 44 tsüngda alirtem aser nisung 3,525 shi arishi küm 45 tema lir. Kasa anogo health care workers 88 aser frontline workers 162 nem vaccine agütsüogo.



Deobarnü Assam Police aser Forest Department yaritepa Karbi Anglong nung Gecko 10 aser Pangolin teküp seret 10 apuba noksa nung angur. Iba atema nisung ana pua lir ta Assam Police indang Special DG, GP Singh-i metetdaksüogo. (Diphu, July 18)

Arunachal nung taoba minister Mekup Dolo süogo

Iitanagar, July 18, 2021

(Agencies): Taoba mapang Arunachal Pradesh social welfare aser women & child development minister Mekup Dolo Honibarnü iba akümüli nungi pilaogo. La arishi küm 61 liasü. Dolo-i la kinungbo aser tanur pezü toktsür asü. 1960 küm April 5 nü Pakke-Kessang kübok Rilloh nung Dolo aso. Seppa nung lai crafts centre indang instructor ka ama inyak. Arunachal Pradesh Assembly nung 1999 nungi 2004 küm tashi lai Bameng constituency nungi MLA ka ama shilem agiogo. Chief Minister Pema Khandu-i taoba minister Dolo asüba osang angashia mangyim jashi lemsatep aser lai toktsür aoba adianutem den asükhu lemsatepa liasü. Governor BD Mishra aser

Legislative Assembly Speaker Pasang D Sona nati taoba MoS, Dolo asüba osang angashia mangyim jashi lemsatepogo. "La iba akümüli nungi pila aoba ajanga, state indang tetsür MLA tajung ka asenok den mali kümogo," ta Governor Mishra-i ashi. "Arunachal Pradesh nübur ajak tenüng nung asür tanela teti tatem maka anisüngzükdakjang aser lai toktsür aoba adianu aser kinungertemi iba tako marok koktetsüsa tashi den parnok molung nung tesünep lidakjangma ta sarasademsür" ta Governor-isa ashi. "MLA Mekup Dolo asüba osang angashia tejashi tulu lemsateper. Tang ama mangyim jashi mapang, lai toktsür aoba adianu aser kinunger tem den asükhu lemsateper," ta Speaker Sona-ia metetdaksüogo.

Legislative Assembly Speaker Pasang D Sona nati taoba MoS, Dolo asüba osang angashia mangyim jashi lemsatepogo. "La iba akümüli nungi pila aoba ajanga, state indang tetsür MLA tajung ka asenok den mali kümogo," ta Governor Mishra-i ashi. "Arunachal Pradesh nübur ajak tenüng nung asür tanela teti tatem maka anisüngzükdakjang aser lai toktsür aoba adianu aser kinungertemi iba tako marok koktetsüsa tashi den parnok molung nung tesünep lidakjangma ta sarasademsür" ta Governor-isa ashi. "MLA Mekup Dolo asüba osang angashia tejashi tulu lemsateper. Tang ama mangyim jashi mapang, lai toktsür aoba adianu aser kinunger tem den asükhu lemsateper," ta Speaker Sona-ia metetdaksüogo.

1960 küm April 5 nü Pakke-Kessang kübok Rilloh nung Dolo aso. Seppa nung lai crafts centre indang instructor ka ama inyak.

Arunachal Pradesh Assembly nung 1999 nungi 2004 küm tashi lai Bameng constituency nungi MLA ka ama shilem agiogo.

Chief Minister Pema Khandu-i taoba minister Dolo asüba osang angashia mangyim jashi lemsatep aser lai toktsür aoba adianutem den asükhu lemsatepa liasü.

Governor BD Mishra aser

Legislative Assembly Speaker Pasang D Sona nati taoba MoS, Dolo asüba osang angashia mangyim jashi lemsatepogo. "La iba akümüli nungi pila aoba ajanga, state indang tetsür MLA tajung ka asenok den mali kümogo," ta Governor Mishra-i ashi. "Arunachal Pradesh nübur ajak tenüng nung asür tanela teti tatem maka anisüngzükdakjang aser lai toktsür aoba adianu aser kinungertemi iba tako marok koktetsüsa tashi den parnok molung nung tesünep lidakjangma ta sarasademsür" ta Governor-isa ashi. "MLA Mekup Dolo asüba osang angashia tejashi tulu lemsateper. Tang ama mangyim jashi mapang, lai toktsür aoba adianu aser kinunger tem den asükhu lemsateper," ta Speaker Sona-ia metetdaksüogo.

Arunachal Pradesh Assembly nung 1999 nungi 2004 küm tashi lai Bameng constituency nungi MLA ka ama shilem agiogo.

Chief Minister Pema Khandu-i taoba minister Dolo asüba osang angashia mangyim jashi lemsatep aser lai toktsür aoba adianutem den asükhu lemsatepa liasü.

Governor BD Mishra aser

Guwahati nung school inspector aser SEBA ketdangsürtem apu

Guwahati, July 18, 2021

(Agencies): Marks agütsütsü atema sen meshizüka agütsü sentong yangluba maparen nung temolung melemi bilemba ken o asüngdangyatsü atema Assam police-i Guwahati nung education department ketdangsür trok puogo. Class 10 nung azünger kaketsürtem nem marks tajung agütsütsü asoshi süpokrem meshia agiba dak sendakba nung Honibarnü police-i Kamrup Inspectorate of Schools indang office mita ao aser tangar ana den SEBA ketdangsür pezü apu. Police-i iba office mita aoba mapang Kamrup District Inspector of School (IS) Madhab Deka, SEBA Co-ordinator Phulpahi Nath, IS office-grade III employee Prashanta Das aser grade IV employee Sibeswar Kalita nunger apu.

Higher Secondary Leaving Certificate Examination (HSLC) kaketsürtem dang sen melena marks tajung agütsütsü atema tasa yangluba maparen nung SEBA ketdangsürtem dena lir ta temolung melemi bilemer. Kamrup Inspectorate of Schools indang office bushisüngdangba mapang police-i laptop, mobile phone aser document tem ngutetogo. Kamrup police-isa iba office nungi sen aika ngutet. State nung Class 10 (HSLC) aser Class 12 (HS) board examination thiogo aser panel takotet ana ajanga tuyuba ama examination indang result sangdongtsü atema sorkari telemteba agiogo. Panel ana yagi Class 10 aser 12 nung azünger kaketsürtem jenjang asadanghsütsü asoshi lezmüktsüba maparen indang report agütsüogo.

Class 10 nung azünger kaketsürtem nem marks tajung agütsütsü asoshi süpokrem meshia agiba dak sendakba nung Honibarnü police-i Kamrup Inspectorate of Schools indang office mita ao aser tangar ana den SEBA ketdangsür pezü apu.

Police-i iba office mita aoba mapang Kamrup District Inspector of School (IS) Madhab Deka, SEBA Co-ordinator Phulpahi Nath, IS office-grade III employee Prashanta Das aser grade IV employee Sibeswar Kalita nunger apu.

Kamrup Inspectorate of Schools indang office bushisüngdangba mapang police-i laptop, mobile phone aser document tem ngutetogo. Kamrup police-isa iba office nungi sen aika ngutet. State nung Class 10 (HSLC) aser Class 12 (HS) board examination thiogo aser panel takotet ana ajanga tuyuba ama examination indang result sangdongtsü atema sorkari telemteba agiogo. Panel ana yagi Class 10 aser 12 nung azünger kaketsürtem jenjang asadanghsütsü asoshi lezmüktsüba maparen indang report agütsüogo.

State nung Class 10 (HSLC) aser Class 12 (HS) board examination thiogo aser panel takotet ana ajanga tuyuba ama examination indang result sangdongtsü atema sorkari telemteba agiogo.

Panel ana yagi Class 10 aser 12 nung azünger kaketsürtem jenjang asadanghsütsü asoshi lezmüktsüba maparen indang report agütsüogo.

Mizoram nung AR-i foreign cigarette aika apu



Aizawl, July 18, 2021

(Agencies): Assam Rifles-i Mizoram kübok Champhai nung bendanglen nungi bener aruba cigarette case 22 apu. Honibarnü HQ Inspector General Assam Rifles (East) kübok Serchhip Battalion of 23 Sector Assam Rifles-i iba tesem mita liasü, ta HQ IGAR (East) sangdong ka ajanga metetdaksü. AR sepatemi apuba cigarette ya shishilembadak Rs 28,60,000 shi alang asütsü ama asadangtetogo. AR-i apuba foreign cigarette ji Customs Preventive Force, Champhai ket nung agütsüogo. Cigarette case den külemi Assam Rifles-i nisung ka apu.

India-Myanmar arrtsülen miima temesepba mozütem shibelenba ajanga Mizoram-i teblemtsü tulu ajurur. Mizoram nung shibelenba maparen nokdangtetba atema 'Sentinels of Northeast' ama Assam Rifles-i mapa agi sayuogo, ta AR sangdong nung ashi. July 14, 2021 nunga, Serchhip Battalion - 23 Sector Assam Rifles-i Chhungte, Mizoram nung bendanglen nungi shibelenba cigarette case 12 shi pua liasü. Shishilembadak item cigarette jenjang sen 15,60,000 shi asütsü ama team-i asadangtet. Iba maparen dak sendakba nung customs preventive force-i nisung ka puogo.

Mizoram nung shibelenba maparen nokdangtetba atema 'Sentinels of Northeast' ama Assam Rifles-i mapa agi sayuogo, ta AR sangdong nung ashi.

July 14, 2021 nunga, Serchhip Battalion - 23 Sector Assam Rifles-i Chhungte, Mizoram nung bendanglen nungi shibelenba cigarette case 12 shi pua liasü. Shishilembadak item cigarette jenjang sen 15,60,000 shi asütsü ama team-i asadangtet.

Iba maparen dak sendakba nung customs preventive force-i nisung ka puogo.

GOVERNMENT OF NAGALAND
NAGALAND STATE EGOVERNANCE SOCIETY (NSEGS)
DIRECTORATE OF INFORMATION TECHNOLOGY & COMMUNICATION
 (Below New Secretariat) Thizama Road, Nagaland: Kohima 797001
 No.NSeGS/EA-1/ 2021 Dated Kohima, 19th July 2021

NOTICE INVITING E-TENDER

REQUEST FOR PROPOSAL (RFP) SELECTION OF CONSULTANCY AGENCY FOR ASSESSMENT AND ANALYSIS OF IT E-READINESS FOR IMPLEMENTATION OF ENTERPRISE ARCHITECTURE

The Nagaland State e-Governance Society (NSEGS) invites e-Tenders from eligible for Assessment and Analysis of IT e-Readiness for Implementation of Enterprise Architecture.

Interested Bidders are requested to download the e-Tender Documents from www.nagalandtenders.gov.in and or www.nagaland.gov.in. All Bids should be submitted only through the e-Tender Portal www.nagalandtenders.gov.in and bids submitted through any other means shall not be accepted.

Important Dates

Sl	Events	Date
1	Start date of issuance / sale of RFP document	19th July 2021
2	Start date and time for RFP Submission	6th August 2021, 2:00 PM
3	Last date and time for RFP Submission	14th August 2021, 2:00 PM
4	Date and time of opening of Pre-Qualification bids	16th August 2021, 12:00 Noon
5	Date and time for opening of Technical bids	17th August 2021, 12:00 Noon
6	Date and time for opening of Commercial bids	20th August 2021, 2:00 PM

Sd/-
Member Secretary(NSeGS) & Director, Department of IT&C, Govt of Nagaland.

Issued by DIPR



TIR YIMYIM

YIMOBILEM (EDITORIAL)

DIMAPUR TENTONÜ, CHITENI (JULY) 19, 2021

Naga nungger tebilemba longjemtsüla

Naga yimten tebilemtsü küm noklang ka shi jembia aruba sülen tangbo Naga yimten tebilemtsü agi Naga nungger lokti tebilemtsüang kumogo. Tanü putu tasenba nung Naga nungger asoshi tia makaji aji ka asütsü. Iba jagiang, tawa Nagaland government nung alirtemi anir opposition purtem dena jatepa amenba senden nunga Naga yimten tebilemtsü latettsü atema Naga nungger yimten nüchiso bushir telok ajak longjemtsü nungdakba onükang tama aser tongtibangba ser jembio. Aji oda, Naga yimten nüchiso bushi tenzükba nungi joko tangbo Naga nungger longjemtsü nungdakba indang jembir, kechiyong Naga nungger yimten nüchiso bushia – bushia, nüchiba - nüchiba akümtsü melen yiarba –yiarba kümdagi aser tangbo Naga nungger rongnung telok shia yimten tebilemba balala kumogo. Joko, shitakba Naga yimten nüchiso indang jembirbo mali aser shitakba yimten ka kübok Naga nungger lushia ajak ayutsübaji tamakoktsü kumogo. Iba ama tensa tia ka nung, Naga nungger telok balala paikaya lemsar aliba ya ka kuma longjemdaksünüyonga telok aika agi ka kuma longjemtsübo kanga tasak asütsü, anungji telok ajak ka kuma melongjemyonga tebilemba aser tangatetba nung ka kuma longjemtettsüla. Asenoki kodang jungjunga asenok tebilemtsü ya bilemdangdir, asenok tebilemtsüji telok aika kuma lemsaba tebilemtsü masü saka telok shia tebilemba balala asüba tebilemtsü-a ta angatettsü. Aji oda, telok aika asüyonga tebilemba ka dang süra telok shia nungi lenirtemi meyongnem agüja telatetba ka dangi arutettsü. Iba tangatetba jagi kodang arudir, asenoki Naga nungger yimten telok shia tebilembatemji bendena medemangteptsüla aser telok ajaki agizükettsüsa asenoki lenjem ka nung ken o renemtsü merangtsüla. Tang Naga nungger yimten nüchiso bushir teloktem rongnung NSCN-IM teloki Naga yimten temzüng aser wako balaka alitsüla ta akanger aser ano Naga nungger yimten teloktem telongjem NNPGs telokibo tang aliba Nagaland state yimten jenjang ya tuluba aser temaba jenjang ka nung Naga yimten latetner, ano NNC telok katibo Naga yimten nüchisoji angutsüla ta nokdaker. Parnok ajakji Naga yimten nüchiso jenjang atema nokdakertem lir. Parnok ajakji Naga yimten nüchiso asoshi nokdak dang kanga timtemogo aser parnok medemertem aika taküm samaogo. Item teloktemji tang tangbo arogoia melongjemdaksütettsü, anungji parnok ajak longjemmatsüla ta ashibaji, Naga yimtenbo kodanga melatettsü, anungji jembitsüa nungdak madoker ta ashiba den kasa asütsü. Iba tangatetba nung joko Naga yimten nüchiso bushir teloktem dang ya longjemtsü asoshi masü saka pei pei bilemba onüktem nung asetshitepa kechi takoktsü aser kechi tamakoktsü itemji tokzüktepa jembitsü atema sabangang tajung ka agütsütsü tim. Iba Nagaland government nung alirtemi agütsütettsüla aser state government nung alirtemi magütsütetra arogo lenirtemi yanglutsütsüla. Tanü asenoki anogo shia asangsang nung ajuruba tiaji Naga yimten nüchiso bushir telok balala nung inyakertem agi ozüng raksar kümer Assam Rifles-temi apuba ya asütsü. Joko, Naga nungger rongnung Naga yimten onük mejembir saka Naga nungger jembiba onük ajunga agi sen dang kumogo, sen dang lira Naga yimten nüchisoa alizükettsüla amato asenoki bilemer. Aji oda, yamaisa ano küm ter ao nungbo, Naga yimten nüchiso onük ya alima rongsen penbuba agi ajunga meyokadoktsü. Asenoki alima nung teti alitsü amai bilemer saka taruba küm ter tsungda Naga yimten lenir aika alima nungi piladoktsü. Iba sülen tanü lanurtemi komaka Naga yimten asoshi süoki ia bilemtsüar memetet. Item mapang aser tensa tia ajakji asadanga tanü menden nung alirtemi Naga nungger tebilemtsü aser tebilemba ajakji angadanga bendener telemtetba kati arutettsüsa inyaktsübajiang tongtibangba kumogo. Naga nungger yimten telok ajaki, joko, India telongjem kübok malitsüsabozuka moutettsü aser Naga nungger lushia yimten ka kübokbo melongjemtettsü ta asüba onük nungbo kasasa bilemer amai angateter. Anungji, tanünga onüktem rongnung Naga nungger temzüng, wako aser Nagaland state dak aketba onüktem den ano Myanmar, Manipur, Arunachal Pradesh aser Assam nung Naga nungger lushia aser Naga nungger jemjia kechi komaka jenjang nung meraketa litettsü ta asüba tebilemtsütem nung tebilemba ka kuma latettsübajibo, Naga nungger asoshi tasak masütsüla. Atangji, Naga nungger asoshi India den telok shia telatetba balala masü saka telatetba ka dang nungdaktsü saka Naga nungger alidak lushia shia telatetba balala nungdaktsü. Iba tangatetba nung India den Naga yimten latettsü junger. Joko, alima ajak ya Naga lima ta bilema sademsadema inyaktsüsa tanünga putu yabo lanurtem nem bendanga amouktsüdi.


OLEMSABANG

REV. S NÜKSHI, PASTOR MOLUNGYIMSEN SÜR KÜM 45 AJUNGBA BILEMTETER

~ R Nükshi Aier

Asür Rev. S Nükshi ya Molungyimsen nung Pastor teinyakdak nung July 19, 1976 anogo akümüli toktsür ao. Pa ya Molungyimsen nungi mezüngbuba Reverend naroküm angusang liasü. Küm jenti süidema oaka pa mapa tajungtem aser pai mejemba ken ajanga pa menungra bilemteter. Rev. S Nükshi asüba anogo bilemteta pai Rev. Dr. E.W. Clark aser kinungtsü Mrs. Mary Mead atema mejemba kentem lemsateper.

1. Aya Khristan lenir tulu,
Ao rongbang medemsang
Anü ita jangja medem
Nü taküm ya meren no!
Lep: Aya tzüra nok nü bang nung
Nai timtem ajuru -
Taremzüc sür temeimi
Khristan pur aniten.
2. Arem min tanak süngkolak nung,
Süngyu akong medem,
Nü kensü osü Ao li nung
Rongjenseta lidisüng
Nokinketer danga taoba,
Khristan arishirsang
Tsüngular den osü ajem
Ao lima süneptsüogo.
Au senti senmang alemsang,
Lanur den munguyu
Terongjen naro mesüka
Remzüka or lidima.
Nü arishi ya Ao li nung,
Künep-a memeyong
Joko nabo Kotak li nung
Namanir sür lidisüng.



Rev. S Nükshi

1. Aya menungrar, Wabongsang Watsüla nena
Lanurtemi nena ngulasang, koda pelala.

Lep: Kotaker o tongdar na sang ta shimtet,
Onoki kodanga mamatetka nei.

2. Au, nenati onok aruba matateti ao,
Sasalikoshi lanurtemi nena jak mangu.
3. Tsa, tanü nena bilemteta, Kibuba sanga
Ao tsükongi nena menungrar tanü anogo.
4. Tenla kidang sentepa mener, Tsüngrem nung sangdi
Nena tsüla ola nükla dang, menungraseter.
5. Ayatai nena arulasang, onok mapa ngur
Khristanpurtem dakji rangloka menüremle nei.

YOUTH DIRECTOR TASENBA ARUOGO

~ Maong Jamir

(Yashi adok nungi...)

Tebilemba kar

11.06.2021 nü Yanglushidi Sensaksem Sabang nung shisatsü balala bendena lemsateper yamai Arogotemi inyak nung jungdisüng ta tebilemba kar lemsateper.

Arogo nung interview kisüng agia tenzüker shimbaji jangratemra masü. Kechiba süra interview nungbo jembishinü aser Tsüngrem O jembia nung kanga takotettem dang adoktsü, saka parnok jakla lirubo asenoki memetettsü.

Alima ainba ama ashiko towntem nungbo interview nungdaka akümtsüa akok. Ajioda interview agiaka, magiaka iba ama inyak nung ajungtsü ta lemsateper.

- Pa/La taküm kuli tejangja. Oda pa/la Tsüngremer tajaba aser mangdang kanga tejangja aliba asütsüla.
- Pa/La tejangja sempetji aser yimya yimkoji külemi lia arurtemi shitettsü anungji confidential reference item nüburtem nungi agi nung junger:
- Pa/la taküm kuli pa/la telidak Arogo/ tesem nungi (Example: pa/la character, dangar den tesendaktep yutetba nisung asü masü etc)
- Pa/la tejaklen inyaka aliba Arogo/mapa nungi kuli (Koma tenzüka aru? Pa/la kechiba anen etc)
- Pa/La dang College nungi renemli süra College nungi kuli tajung (Pa iba post nung inyaktsü temsüa ali mali). etc
- Tsükong mesüra yim repranga shimbaji Tsüngremi mulungba masü.
- College background machitsü, saka pa/la biblical/theological soundness bo asadangtsüla.
- Compassing aoba angashira iba nisungbaji magitsüla.
- Tetsür/tebur ta masü sempet lira aser mapa den tapet süra shimtsüla
- Interview board nunga sang, bushiba committee nunga sang tenzüker kabosa tena alitsü. Anungji pai/lai anir alima tashiyim, tejak reprangba, kinunger, yimer, kidong aser tsükong ta bensaba tashi nem mokokdaksütsü saka tenzükersang/ lai anir committee pur nem tangatetba agüja aser sarasadema ochi agi shitakba nisungji shimtsüla. Tenzüker kaji aibelener ka makümtsüla.

Temalen agüja aliba tebelibatemi tabensababo masü saka iba amaji danga inyakra Arogo aser lokti tejakleni anidisü ta lemsateper.

Lai tesayuba:

Gal. 1:10 Kechiyong tang nisung mulung chidaksütsü ni bushir asü? Mesüra Tsüngrem? Mesüra ni nisung peladaksütsü meranger ama? Ni nisung peladaksüra, ni Khrista lar masü.

2 Tim. 4:3-4 Kechiyong koba mapang nung parnoki adangji sayuba maremzüksü, saka pei-i anganüba dang angatsü pur kuma, pei azüapongba amato pei sasa asoshi tesayur telong telong ayutsü, aser ochi nungi parnok tenarong meyipa otsü dangi mashi leni aotsü; ibala mapang arutsü.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Stellar Gospel Music Awards: Mike-i artist of the year award angu



Schermerhorn Symphony Center, Nashville nung 36buba Stellar Gospel Music Awards sentong nung The Clark Sisters tangokba noksa nung angur.

July 18, 2021: 2021 Stellar Gospel Music Awards sentong nung Clark Sisters-i award pezü angu, James Cleveland-i Lifetime achievement award angu aser Pastor Mike Jr.-i 'Artist of the year' award nguogo; iba sentong ya Honibarnü (July 10) Schermerhorn Symphony Center, Nashville nung agi aser August 1 nü BET channel nung iba sentong yoktsü.

Pastor Mike Jr.-i pa indang kensep 'Freedom Sessions' ajanga Artist of the year award angu aser kasa kensep ajanga pai won rap hip hop gospel album of the year award-a angu.

Pastor Mike Jr.-isa 'I Got It' ken ajanga urban/inspirational single/performance of the year award-a nguogo.

Awards sentong nung Tasha Cobbs Leonard aser Jonathan McReynolds nati award asemsem angu. Leonard-i Albertina Walker female vocalist of the year award, contemporary female vocalist of the year aser praise & worship album of the year awards angu aser McReynolds-i Male vocalist of the year, Contemporary male vocalist of the year aser Producer of the year award angu.

Stellar Gospel Music Awards angurtem:

Artist of the year: Pastor Mike Jr.; Big: Freedom Sessions; Black Smoke Music Worldwide

Song of the year: "Something Has to Break" (Live) ft. Tasha Cobbs Leonard; Kierra Valencia Sheard, J. Drew Sheard II, Jonathan Smith & Mia Fields; Karew / RCA Inspiration

Male vocalist of the year: Jonathan McReynolds; People; eOne Music

Albertina Walker female vocalist of the year: Tasha

Cobbs Leonard; Royalty: Live at the Ryman; Motown Gospel Duo/chorus group of the year: The Clark Sisters, The Return, Karew Entertainment/Motown Gospel

New artist of the year: Maverick City Music; Maverick City Music Vol 3 Part 1; Tribl Records

Album of the year: Maverick City Music Vol 3 Part 1; Maverick City Music; Tribl Records

Choir of the year: JJ Hairston; Not Holding Back; JamesTown Music / eOne Music

Producer of the year: Jonathan McReynolds, Darryl "LiLMaN" Howell & Rogest "Rosco" Carstarphen, Jr.; People; eOne Music

Contemporary duo/chorus group of the year: Anthony Brown & group therAPy; 2econd Wind: Ready; Key of A / Tyscot / Fair Trade

Traditional duo/chorus group of the year: The Clark Sisters; Gospel According to PJ; Morton Inspiration/Tyscot

Contemporary male vocalist of the year: Jonathan McReynolds; People; eOne Music

Traditional male vocalist of the year: Donnie McClurkin; A Different Song; Camdon Music / RCA Inspiration

Contemporary female vocalist of the year: Tasha Cobbs Leonard; Royalty: Live at the Ryman; Motown Gospel

Traditional female vocalist of the year: Jekalyn Carr; Changing Your Story; Lunjeal Music Group

Contemporary album of the year: Kierra; Kierra Sheard; Karew / RCA Inspiration

Traditional album of the year: Changing Your Story; JeKaly Carr; Lunjeal Music Group

Urban/inspirational single or

performance of the year: I Got It; Pastor Mike Jr.; Black Smoke Music Worldwide

Music video of the year: Something Has to Break (Live); James Hairston IV; Karew / RCA Inspiration

Traditional choir of the year: Ricky Dillard; Choirmaster; Motown Gospel

Contemporary choir of the year: JJ Hairston; Not Holding Back; JamesTown Music / eOne Music

Instrumental album of the year: My Tribute; Myron Butler; Major Mynor Productions / Sherman James Productions

Special event album of the year: The First Ladies of Gospel: The Clark Sisters Biopic Soundtrack; Various Artists; Releve Entertainment

Rap hip hop gospel album of the year: Big: Freedom Sessions; Pastor Mike Jr.; Black Smoke Music Worldwide

Youth project of the year: Anthony White & Detroit Youth Choir; Glory; NYC Entertainment

Quartet of the year: Young Men 4 Christ; Elevation; B.R.A.T.T. Music Studio

Recorded music packaging of the year: Royalty: Live at the Ryman; Justin Foster & Drew Kellum; Motown Gospel

Praise and worship album of the year: Royalty: Live at the Ryman; Tasha Cobbs Leonard; Motown Gospel

James Cleveland lifetime achievement award: The Clark Sisters

Aretha Franklin icon award: Tramaine Hawkins

Thomas A. Dorsey most notable achievement award: Bishop Dr. Leonard Scott

Ambassador Dr. Bobby Jones legends award: Pastor Shirley Caesar

Stellar honors hall of fame: Kerry Douglas; Dr. Teresa Hairston; Skip.

ANO GO ABEN TSÜNGREM DEN

Tekülem Kolosi 3:12-25

Shisatsü ajak nung medemer o medemer na tenüngsang ken aser temeshi ken aser tanela ken agi sayua ajungshiang aser nenok temulung nung taochi ken agi Tsüngrem dang tenang. Kolosi 3:16

Yisu sülen anidaker shia taküm tepiyong tangazüker dang masü, saka tangar dang sayurtemi asütsüla. Tsüngremi Israel nunger teburtem aser tetsürtem dang parnok chirnurtem dang Pai melaba ozüng kümdanga sayutsü ashi. Mathi kaket tenyaba mapa tuluj pastor aser tesayurtem asoshi dang masü. Efesa aser Kolosi shiti nung tanelaren aintsü asoshi arogo telungjem nung züngsem ajakji tesayur ta zülü.

Telok tekülem nung asenoki kati ka dang sayur. Lai nungi lemsateper, committee nung, lanur telok nung kati ka dang sayur. Ano asenoki takok tamakok anguba lenmang ajanga sayur; asenoki inyakba lenmang, asenoki bilemba aser asen tejangraba arishiba lenmang ajanga sayutsü akok. Atangjichila nung asenoki kar dangbosa sayur.

Tanü asenok dangi arurtem dang nai aser ni kechi sayur? Lanurtem nem asenok tanelaren kechi tesangwa agütsür? Taintem den inyakdang asenoki parnok lemang nung tashi itdaksür asü, tezüdangdaksür?

Asenoki O aser temeshi mapa ajanga sayutsü Tanela Temeshi dak metalokdi (Lk. 12:12) idangji asenoki tangar dang sayutettsü. Aser kodang asenoki Tsüngrem O jembitsü taküm kuli nung tamakok ngudir, tangar tashi itdaksütsü mokoklir, majungshitet lir, mesüra Tsüngrem temeim lemsatepba nung tamakok ngudir asenok Yisu Khrista dak repringdi kechiaser Pa tesayur tulutiba dang masü, saka Pai kangki nung asen tamakok ajak aben. Pa dak asenok temenen tatokba aka aser apusotsü asoshi tashi tasen angu.

Temeim, tangar dang sayutsü onok tesayur tajung kümjang. O aser mapa nung Ne temeim lemsateptsü yariang. Amen.

Uttar Pradesh nung Khristantem anema inyakba kanga bulua kümogo

Washington D.C, July 18

(Agencies): India nung nütüng timtiba aliba state-Uttar Pradesh nung tesüiba hopta ishika Khristantem anema inyakba kanga bulua kümogo.

Tawa Uttar Pradesh nung Khristan 18 apu, Khristantem tekülem sentong tagidak mapang nung timtem agütsü aser aser Khristantemi kangshia tamangba yimsü meyipdaksür, ta tiyazü nung tai tonglokja aika apu.

Kanga ajungbena state nung Khristantem anema inyakba ajanga state Khristantem kanga shisabulur, ta International Christian Copncern (ICC)-i metetdaksü.

Uttar Pradesh nung anti-conversion ozüng tasenba kübok Muslim nunger ana apuba sülen tensa mejungi kümogo. Bharatiya Janata Party (BJP)-i aniba sorkar ketdangsertem aser Hindu nationalist züngsemtemi ashiba agi, state nung nisung 1000 dak tema Islam yimsü dangi meyipdaksüba nung Muslim nunger ana jagi shilem agia lir.

ICC den jembidang state nung Khristan lenir, Dinanath-i, "Yimtenren nung tajangzük angütsü atema tamangba yimsü amshiba ya kanga tia maka. Taruba election nung jenjang ajungtsü atema yimtenren lenirtemi inyaker aser ibaji ajanga yimten lenirtem aser osangbenertem naprong

tajangzük angur, saka Muslim aser Khristantem densema tai maket nisungtem kanga takoksa angur," ta metetdaksü.

"Tanga state tem nung ama masü saka Uttar Pradesh nungbo Hindu yimsü alia amangertemji state ketdangsertem aser police napronglai pusemer," ta paisa metetdaksü.

Taküm June 27, 2021 nüa Uttar Pradesh kübok Ambedkarnagar district nung Hindu yimsü alia amangertemi Khristantem tekülem sentong tagidak mapang nung timtem agütsü aser Ram Keval densema Khristan pezü apu. Iba sülen par pezüprongla tepuokdak anogo 11 tashi ayuba sülen ang chioka liasü.

June 28, 2021 nüa Dhawrara nung Khristan sentong ka agiba mapang nung police-i pastor, Shiva Kumar puer ao. Osang angazükba agi, nisung kati phone ajanga police dang, sentong ka nung Khristan lenir kati Hindu nungertem Khristan yimsü dangi meyipdaksüdar, ta osang metetdaksüba sülen police arua pastor apu.

Tiyazü nung tai tongloktsüba nung ajemdaker police-i Pastor Kumar den Khristan asem anema ken o benok. Uttar Pradesh Freedom of Religion Act 2020 kübok Khristan pezü anema ken o benoka liasü.

Yamaji Uttar Pradesh nung Khristantem anema inyakba aser apuba tatalokba aika lir.

OLONG PAITEP # 5879

	1				2	3				
4			5						6	
						7				
	8									
	9			10			11			
						12			13	
14										
						15				
		16								

TIPLÉN		LANGTSÜNGLEN	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	- (4)
16. Tzü shiruru ka	- (4)	jatepba	- (4)

OLONG PAITEP # 5878 TELANGZÜBA

TIPLÉN :	LANGTSÜNGLEN :
1. Lemsä, 3. Osang, 5. Mezüng,	1. Lamén, 2. Sangken, 3. Omen,
6. Agi, 7. Süra, 8. Tebutem,	4. Asüküm, 7. Sendong, 8. Tejang,
9. Amen, 12. Odi, 13. Asayar,	10. Tanga, 11. Tazü.
14. Angsü, 15. Agima.	



COVID-19 VACCINE MEJI NUNG MANGATETTEP TULU ADOKOGO

Sobang : Kapu...COVID-19 Vaccine agitsü/magitsü meji nung asen nübur tsüngda ashitepba ya kechi sayatenyateper...??? Koa nai-a kechi ashir...???

Alokba : Waaaaaa...!!! Alima nung putu mapang shia tashitak wara tapu-tapu adoka nisung taküm jenti tepsetba otsü lir...Anungji tashitak wara nungi nisung taküm kümzüktsü atema mozü aser Vaccine agir...Onok lanuwa asüdanga Yaksu - Longrakra - Azüsen- Ramen yamala tashitak aika adokAnungji iba wara nungi taküm kümzüktsü atema 'Ayak atepba' teben nung tarak ya reprangang hiiiiii.... Tashitak nungi kümzüktsü atema vaccine agiba ya tanü tasen masü...Cancer-Malaria-TB tashitak nungi kümzüktsü atema Vaccine agir sudi-do...??? Sura Cancer - Malaria - TB tashitak wara atema Vaccine agiba agi tamanger shinga tanela jenjang meraksa ado naaa...??? Surabang COVID-19 tashitak atema Vaccine agiba agibo kodaser tanela jenjang raksatsü...??? Itum ajak ya tashitak wara dang masü naa...???

Sobang : OooooooooH...!!! Ni angatetogo...Vaccine agitsü kecha meratai tang agidi.

~ Lilir : L. Kika Pongener.

AO OSHI ANGAZÜKDAK:

TANÜ ANGAZÜKTSÜBA OJANG



Kijungrak

(n) kibong kümer alir kinungtsü mesüra kinungbo rakzüka agiba (illegal marriage with married man or woman.)

Kijungraka akümba kibongji jangratema malitsü.

Kibalenbu

(n) tetsür o tebur na kinungbo kinungtsü küma kibong akümba (marriage)

* **Kibalenbu** shitaksa kibong kümra azükarutsü.

NAI-A YA METETTER MA?

Mongolbarnü (13.07.2021) New York kübok restaurant ka nung jenjang tasaktiba indang French Fries yanglutetba atema Guinness World Records title ajangzükttet. 'National French Fries Day' (13.07.2021) anogomung den putepa, Manhattan kübok lapoka aliba Serendipity 3 restaurant nung jenjang tulu aketba French Fries ya Creative Chef, Joe Calderone aser Corporate Executive Chef, Fredrick Schoen-Kiewert nati anepalua yangluogo. Iba French Fries jenjang dollar 200 asütsü aser Dom Perignon Champagne, France nungi cage-free goose fat aser J. LeBlanc French Champagne Ardenne Vinegar meyoktepa item French Fries yanglua liasü.



TANÜBO NAI LANGZÜANG

Q. AUSINDEX ya ___ maritime exercise lir.

- A.Japan
- B.Malaysia
- C.Singapore
- D.Thailand

—————(Taruba adok nung onoki langzüksü)

YASHI ADOK TELANGZÜBA : Finance

SUDOKU # 5919

TELANGZUBA # 5918

		8		2		6		3		6	3	1	7	2	4	5	9	8
	2	1		3						7	8	9	5	6	1	4	2	3
		9		5	8			1		2	4	5	8	3	9	6	7	1
					4	3	9	1		5	2	8	4	9	3	7	1	6
						2	8			9	6	4	1	7	2	3	8	5
9		3	8	7			6	5		1	7	3	6	8	5	2	4	9
5	9	2	6	8		1	7	4		3	5	7	2	1	8	9	6	4
1		4	2			8				4	1	2	9	5	6	8	3	7
			1	4	7		2	9		8	9	6	3	4	7	1	5	2

OJANG LUTEP # 5464

LAKTIA	:	<input type="text"/>
IKANYA	:	<input type="text"/>
URY	:	<input type="text"/>
LUTU	:	<input type="text"/>
INKTYAET	:	<input type="text"/>
MAA	:	<input type="text"/>
AKLAJEN	:	<input type="text"/>
TEANYAKSGA	:	<input type="text"/>
ITJEMBSÜ	:	<input type="text"/>
MENDAÜNGK	:	<input type="text"/>

OJANG LUTEP TELANGZÜBA # 5463

TAKÜM LIBALIRO KÜMDANGA ASER ASÜNGTETA ALIRI TARAK MEKETI LITETA AOER

TAN HOPTA ATEMA - KOMA SÜLA ?

Q. Akhi tsüraburtemi yim akümdang yatetba ali kimong aser alushi dak alaka, tanü putu tasenba nung kibong kati ajangzükttetba ali rongsentem madakbo, kibur küma senmangtsü asoshi, tetsür - tebur aser jala- jabaso ta mali, kibong nung tsürabur ana mulung südaktsü nunga koma süla ?

CHRISTIAN HIGHER SECONDARY SCHOOL

NYAMO LOTH ROAD, DIMAPUR - 797112, NAGALAND

E-mail: christian.dimapur@gmail.com

Website: www.chssdimapur.com

We design your child's future



We build your child's career

IN LOVE AND

TRUTH WE STRIVE

**ONLINE & SPOT ADMISSION FOR CL. 11 ARTS & COM.
FROM 20TH JULY 2021 ONWARDS**

- Limited seats available.
- Downloaded Marksheet, Admit card and passport size photo required.
- For spot admission candidate with parent/guardian is mandatory.
- For Online Admission visit www.chssdimapur.com (admission section).
- For enquiries call # 7005755299 / 8730071215 between (9:00am - 12:00 noon)

India nung ano nisung 41,157 dak Covid putet aser 518 süogo

New Delhi, July 18

(Agencies): India nung ano nisung 41,157 dak coronavirus putet aser tang tashi nungbo linük nung nisung ajak senteper 4,22,660 dak iba tashidak putetogo, ta Amongnü Ministry of Health & Family Welfare-i metetdaksü.

Tesüiba ghonda 24 nungsa coronavirus agi shiranger 518 asü aser ibaji densemabo tang tashi nung iba tashidak agi shiranger 4,13,609 süogo, ta Health Ministry-i metetdaksü.

Tesüiba ghonda 24 tsüingda coronavirus agi shiranger 42,004

anepogo aser iba tashidak agi shiranger ajak senteperbo 3,02,69,796 anepogo.

Indian Council of Medical Research (ICMR) nung Epidemiology & Infectious diseases tongti, Dr Samiran Panda-i, August ita tatembanglen tashi nung linük nung coronavirus wave tasembuba tenzüksüa akok, ta tekümdangtsü metetdaksüogo.

Coronavirus mezüingbuba aser tanabuba wave mapang nung wara agi junga mekongshiba state temi tenokdangbatem junga

benshitsuä, mesüra tasembuba wave agi mejungi kongshitsu, ta metetdakja Dr Panda-i, "State shiai wara asadangtsüla aser covid tensa nung ajemdaker mera agia inyaktsüla," ta metetdaksü.

Honibarnü Union Health Ministry-i, coronavirus tashidak ajanga tuberculosis tashidak adoktsüa akok, ta metetdaksüogo. Coronavirus tashidak agi shiranger aika dak Tuberculosis (TB) tashidak kanga bulua putetba nung ajemdaker Health Ministry-i iba osang ya metetdaksü.

Sorkar tashi alema Delhi LG-i telemtetba magitsüla: Manish Sisodia

New Delhi, July 18

(Agencies): AAP lenir aser Delhi Deputy Chief Minister, Manish Sisodia-i Delhi Lieutenant Governor (LG) Anil Bajjal dang, nüburtemi shimtetba sorkar kübok aliba onüktem nung nai telemtetba agiba anentsüla, ta mepishia metetdaksü.

Delhi nung Arvind Kejriwal-i aniba sorkar aser LG na tsüingda tashi raktepba onük nung Sisodia-i, tesüiba ita asem tashi LG-i Delhi sorkar kübok department balala nung tongti ketdangsertem LG office-i jaoka senden mena telemtetba agir, ta aitsü.

Bajjal-i department balala nungi ketdangsertem den senden amener, aser departments dak sendakba tetuyuba balala agütsür, ta paisa aitsü.

Item onük nung Bajjal-i ketdangsertem den senden mena tetuyuba magütsütsüla, ta shia Sisodia-i, "Nai (Bajjal) senden ayonga amenba aser tetuyuba agütsüba ya linük temzüng alema dang masü saka Supreme Court tetuyuba alema lir," ta ashi.

"Nüburtemi shimtetba sorkar sendokba aser nai ketdangsertem jaoka telemtetba agiba ya democracy tepsetba lir," ta AAP lenirisa metetdaksü.

Centre sorkari National Capital Territory of Delhi (Amendment) Act, 2021 ozüing agizükba sülen taküm April 27

nungi tenzuka Union Territory nung 'sorkar' tetezü Delhi LG, Anil Bajjal lir.

Manish Sisodia-i, "Yimtenren tsütsülen nungi na ronghshiaka yimlibilema democracy tashi tali itshitsu atema nai L-G ka ama inyakang," ta ashi.

Centre sorkari shimba Governors mesüra Lieutenant Governors-i nüburtemi shimtetba sorkar sendoka onük ajak nung telemtetba agi tenzükra linük nung kanga

meranga aazükba democracy anenadoktsü, ta paisa ashi.

"Delhi Lieutenant Governor-i indang-indanga department balala nungi ketdangsertem jaoka senden amentsü, telemtetba agitsü aser tetuyuba agütsütsü atema pa nem tashi agütsüba linük temzüng kecha nunga shia mali," ta Sisodia-i ashi.

Linük temzüng kübok ali, police aser tensa azüoktsü atema dang Delhi LG nem tashi agüja lir, ta paisa shisem.

Mumbai nung tzünglu aser anentsüh lendong nung nisung 25 asü



July 18 nü Mumbai nung tzünglu kanga aruba sülen Santacruz-Chembur Link Road nung tzü metsünga alidak gari aser nisungtem senzüba noksa nung angur.



OFFICE OF THE
KOHIMA JANGPETKONG SENSO TELONGJEM
KOHIMA : NAGALAND

TENÜNGSANG AGÜTSÜR

Kohima Jangpetkong Senso Telongjem (KJST) ajanga Wb. T. Sanny Pongener (Dibuia) Director Sericulture menden tongtetba aser Er. Tiameren Walling (Khar), Chief Engineer, NPWD, menden tongtetba atema atema tena nem tenüngsang aser tetushi agütsür.

Meneni tarutsu nunga nübor tenzükba wadang nung Tsüngremi nüna nem taküm tali moajangma ta onok sarasadem.

Sd/-
B. Alem Pongen
President

Sd/-
I. Watitemjen Walling
General Secretary

Parliament jelia opposition lenirtem senden ayonga amen

New Delhi, Chiteni/July 18

(Agencies): July 19, 2021 nü Parliament senden tenzüksü lia Amongnü opposition party tem nungi lenirtem senden mena Parliament nung sorkar anema nokdaksü atema asalentong yangluogo.

Opposition lenirtemi Parliament nung aluyimertemi ozüing tasen asem anema longkak aitba, sorkar meyong nija dang ayokba, totzü jenjang maneni atuba aser sedition ozüing densema onük aika süoka jembitsü lemtetogo, ta osang angazüker.

Osangbener den jembidang Communist Party of India (Marxist) Rajya Sabha MP aser House lenir, Elamaram Kareem-i, Union Parliamentary Affairs Minister Pralhad Joshi den party ajak senden amenba sülen Rajya Sabha nung Congress lenir, Mallikarjun Khadge-i opposition party tem senden ka ayongzuka liasü, ta metetdaksü.

Paisa, "Senden nung Privatisation, aluyimertem onük, Supreme Court-i IPC Arrla 124 A dak sendakba nung oshidang agütsüba densema onük aika süoka jembio. Opposition party tem obang ka ser jembitsü nükjidong nung iba senden amen," ta metetdaksü.

Hombar nungi Parliament senden tenzüksü lia Amongnü

Union Parliamentary Affairs Minister Pralhad Joshi-i yimtenren party ajak senden ka ayongzuka liasü, aser iba senden nungji Ato kilonser, Narendra Modi-a aden. Party ajak senden nung opposition party 33 nungi lenir 40 dak tema aden.

Iba senden nung jembidang Ato kilonser, Modi-i taruba Parliament nung sorkari onük aika nung o lemteptsü melunga lir, anungji senden tajangzük ngua katettsü atema party ajaki amalitepdaktsüner, ta mepishia metetdaksü.

Lok Sabha speaker, Om Birla-ia Lok Sabha nung party balala nungi lenirtem ajurua liasü.

Modi aser Joshi na dak alia senden nung Defence Minister Rajnath Singh, Union Minister aser Rajya Sabha nung House lenir, Piyush Goyal, Rajya Sabha nung opposition lenir, Mallikarjun Kharge aser Lok Sabha nung Congress lenir, Adhir Ranjan Chowdhury nungera aden.

Senden nung adener opposition lenirtem rongnung TMC nungi Derek O' Brien, DMK nungi Tiruchi Siva, Samajwadi Party lenir, Ram Gopal Yadav aser BSP lenir, Satish Mishra nung densema liasü. Apna Dal lenir aser NDA teloktep nungi Anupriya Patel aser LJP lenir, Pashupati Paras nata senden nung denogo.

Mumbai, July 18

(Agencies): Honibar aonung nungi tenzuka tzünglu kanga sashia aruba aser anentsüh lendong nung Mumbai nung nisung 25 süogo.

Tzünglu sashia aruba sülen Western Railway & Central Railway-i khenpiga atema train services anen aser state balalai aoba train services-a anena liasü.

Mumbai nung lung jara ka chirepba ajanga ki ishika anenbangba lendong nung nisung tenet mejungi yirua Rajawadi hospital-i anir ao.

Mumbai kübok Vikhroli nunga anepdang 2:30 ako meta

ki trok chirepba lendong nung nisung tenet asü aser nisung ana yirua anasa aliba hospital kati anir ao.

India Meteorological Department (IMD)-i maneni Mumbai nung alirtem dang kümküma alitsü metetdaksüogo, ta BMC ketdangser kati ashi.

Ajungbena tsüngsang mopung melenshiba agi Mumbai nung ghonda trok tsüingda tzünglu 100 mm dak tema aruogo, ta Amongnü anepdang IMD-i metetdaksü.

IMD-i, Amongnü anepdang 6:30 ako tashi nung Mumbai aser telongtet nung tzünglu 120 mm dak tema aruogo, ta metetdaksüba den külemi maneni tesem kar nung tzünglu sashia arutsü, ta tekümdangtsü metetdaksüogo.



Erftstadt, Germany nung aliba B265 federal highway nung rescue services ajanga gari aser truck teraksa lenmang tezülen bendenba mapang tangokba noksa ka yangi angur. Germany nung hopta tiyongtsülen tzunglu kanga sashia arua tzümetsung adokba lendong nung nisung 180 shi süogo aser ano aika samar bushir.

Thailand nung COVID-19 cases timba akumer

Bangkok, Chiteni/July 18 (Agencies): Thailand nung asemnü tashi maneni COVID-19 tashidak kanga sashia putetba ajanga ano province talila asem nung tenokdangba agütsüsemogo, aser yangji tongtipang masüba nung kimai mayazüktsü aser aonung curfew alitsü dena lir.

Deobarnü Royal Gazettee nung sangdongba nung Chonburi, Ayutthaya aser Chachoengsao province tem nung alirtem Mongulbarnü nungi tenzüka menüngdakba nung ki yutsür aotsü memelatsü, ta shia liasü.

Aonung 9:00 ako nungi anepdang 4:00 ako (par mapang) tashi curfew alitsü aser nüburtem pei province alema senzüba nokdangtsü atema checkpoint tem amenoktsü, ta ashi.

Bangkok aser danga province tuko nungbo iba tenokdangba ya taoba Hombarnü nungi benoka amshir, koba küm ka dak tema nung talenba tesashitiba alitsü.

Thailand nung Deobarnü nisung tasen 11,397 dak COVID-19 tashidak putet aser kasa tashidak yagi nisung 101 asü. Tang tashinung iba linük nung coronavirus cases ya 403,386 aser tasüba nisung 3,341 alitsü.

Thailand nung iba tashidak agi asüba ya April ita sülen liasü, kong kanga mela menatepa aoba Alpha aser Delta variant temai jateta adok.

Iba tashidak agi nisung menepa mozüki nung masemer tim atemer, rongsenketzung nung tetsükdaktsü agütsü aser tourism tanaben arudaktsütsü sentongtem nung temolung melemteti akumer.

Iba tashidak azüoktsü nükjidong nung Thailand-i Hokulbarnü nungi tenzüka linük tesem ajungalen lokti adenshiba nokdang, aser iba totuyuba nung aibelener küm ana tashi tepuokdak ayutsü, mesüra senchi sen Thai baht 40,000 (\$1,220) achitsü mesüra anaprong agi melenshitsü, ta sangdong.

Mozü bener aruba tsütsü khuret balala aliba mechi linük nung COVID-19 mozü agütsüba maparen kanga anüalema lir.

Thailand nütsüng yongsük shilem pongu dang COVID-19 mozü agiogo aser health ketdangsurtemi taoba hopta sangdong ka nung, linük nung yangluba AstraZeneca mozü bendangleni yokba ajemdaktsütsü merangtsü, kechiaser linük nung nüngdakba meperiteter, ta shia liasü.

Taliban lenirtemi yimden yimsüsüba dak ajemdaker ken o bentetner

Kabul, Chiteni/July 18 (Agencies): Taliban lenirtemi rongnung tongtiba, Hibatullah Akhundzada-i Afghanistan nung mangatetep adoker aliba ya yimden yimsüsüba dak ajemdaker ken o bentetner, ta Deobarnü shiogo. Taliban puri Afghanistan ajunga amokbanga aotsü merangba mapang ka nung pai tang iba tebilemba lemsatepogo.

Afghan sorkar

Kenya nung totzü abenba gari ka apok; nisung 13 asü

Nairobi, Chiteni/July 18 (Agencies): Kenya anüolen tsütsü totzü abenba gari ka mükepoker mi adokba nung nisung 13 asü aser ano aika temang kangasa mejungi rongsa, aser nüburtem totzü yimshiba bendeni sentepa liasü, ta police temi ashi.

Linük yimtiba, Nairobi nungi northwest tsütsü kilometer 315 shi pilar Malanga anasa Kisumu aser Uganda den arrtsü nung kanga mazüngi aliba highway nung Deobar aonung totzü bena aliba truck ya danga gari ka den tsükteper lao.

Anasa alirtem jerrycan tem amer nungtepa ao, saka iba gari ya poka milong tuluka adoka liasü.

"Gari nungi totzü yimzüka aluba bendenba mapang mi adoka arong. Iba tesem nung nisung tasümgang 12 zümgangtet. Ano nisung ka mozü kidang kasa zübu agi asü," ta Siaya County nung police tanishir Charles Chacha-i Deobarnü ashi, kong lendong ya ataloka liasü.

Iba mi remseptsü asoshi firefighter tem lendong ataloker ghonda ana lir tonga arutet aser yirua alirtem ya mozü kidangi anir ao.

"Nisung aoka temang kangasa mejungi rongsar mozü

kidangi anir ogo, aser yangji tanurtem dena lir," ta Chacha-i ashi.

Gari nung mi jangrua apokba tera yabo ano mejangja lir.

Kenya nung media balala nung noksa prokshiba nung aonung iba tanker nungi mi jangrua aliba aser anemdang nüburtem iba gari teraksa alidak adenshia aliba nguogo.

Kenya aser ano East Africa region nung lenmang tamajung nung iba ama totzü abenba gari lendong tulu ajuruba ya tang tasen masü.

Taoba mapang iba ama lendong atalokba nung nisung noklang aika asüba sülen ketdangsurtemi nüburtem dang lendong ajurua aliba totzü abenba gari nungi totzü magizüktsü shiaka makamait mechi Kenya nungertemi maneni totzü agizüktsü meranger, aser iba mapang mi adoka lendong tesashiba kumdaktsür aser nisung takum jenti lalur.

2009 küm gasoline tanker ka laoa adlidak nisung jenti adenshia lia iba gari ya apok, aser idangji nisuhng 120 asü. Saka chiyongtsü aser totzü nung jenjang tali akumba ajanga pei tanurtem memesüteter, ta makamait kibongtemi ashir.



Bogor, Indonesia nung leper ator ka PPE kit agir anisüngzüka aliba noksa nung angur. Indonesia nung tang COVID-19 cases kanga sashia jateta aoba mapang lir, kong kanga mela menatepa aoba Delta variant puteta mozüki süngogo aser nisung aika mozüki nung yipten agi masem kidang asür. Nütsüng yongsük million 270 dak tema aliba linük, Indonesia nung tan hopta nisung 57,000 jungnüa dak COVID-19 putet aser anogoshi nisung 1,000 shi asür.

ketdangsurtem aser Taliban lenirtem hopta tatemi Doha nung yimjung atema sensaksemtsü ajurutepeba sülen iba osang sangdongogo. Yimjung asoshi sensaksem mapang talangka bangdaka ayuba sülen tanaben jembishini tenzüshiba ajanga Afghanistan nung yimjung bener arutsü timla agütsür.

"Sepaitem tajangzük ngua tejakleni oaka Islamic Emirate-i yimden yimsüsüba dak ajemdaker ken o bentetener," ta Akhundzada-i ashiba osang ka taruba hopta Muslim nung benjung Eid al-Adha matong tsümgangda prokshio.

"Islamic inyakyim ka amenoktsü aser yimjung aser teküzmzüka bener arutsü atema maongka anguba tashi Islamic Emirate-i amshitsü," ta pai ashi.

Ita aika sorkar aser Taliba na Qatar yimtiba nung yimjung atema sensaksemtsü asoshi ajurutepeba arudar, saka temelenshi repringtetsüsa tajangzük kecha makai arudar, aser kasa mapang nung telungpurtem jenjang kanga junga akümba sülen iba sensaksem tashimeite kümogo.

Taliba lenirisa, rara anendaktsütsü atema ken o bentettsü asoshi par telok bendanga agütsür lir, ajisüaka opposition party temi mapang kanga intokba atema aitsüogo.

"Bendanger dak metaloktsü

melena asenok ken o ya asenok tsümgangda bentetti aru aser tasoli mepetmesü tulu nung aliba nung anitetti," ta pai shisem.

United States aser tanga bendanger sepaitemi Afghanistan toktsür ao tenzüker tatembanglen kati aruba mapang Taliban pur kanga tashi ita kümogo aser parnoki linük kübok tongtibang tesem aika kanga kara amokbango.

Taliban puri Afghanistan kübok district 400 aliba nungi tesadang kashibo amokbanger alitsü ta amanger aser iba den arrtsü nung tongtibang tesemtem amokbango aser Province yimtiba aika sabanga yur lir.

Taliban yongtsü nung lenirtem tsümgangda telemdang adokogo ta taoba mapang olulu osang prokshia liasü, ajisüaka parnok longjemer aliba repringteter aser lenir tarensen tapet kübok military campaign tasaktem aika takok ngua inyakyonga odar.

Tang tasümgangdangba ka adokbaji Taliban lenirtemi parnok kübok aliba arkotongtem kechi koma azüokteta lir aser sorkar den tenangzüktepeba ka yanglura parnok koma iba küboki aittsü asoshi jembizükttetsü. Hibatullah-i sangdongba osang nung Eid benjungmung mapang nung rara anena atatsü asoshi kecha shisema mali.

(Maneni tapak 9 nung...)

Cannes 2021: Titane-i Palme d'Or takok angu



Cannes, Chiteni/July 18, 2021: 74buba Cannes Film Festival sentong nung 'Titane' film atema director Julia Ducournau-i Palme d'Or takok anguba sülen award amer tangokba noksa ka yangi angur.

Cannes, Chiteni/July 18, 2021 (Agencies): Honibarnü, '2021 Cannes Film Festival' sentong takok ngua agiogo. Mezüngbo, 74buba Cannes Festival ya May 11 nungi 22, 2021 tashi agütsü renem, saka Covid-19 tensa süngjema maoba ajanga iba sentong July 6 nungi 17, 2021 tashi agiogo. Taküm, iba festival sentong atema American director aser screenwriter Spike Lee jury nung tekolak liasü.

Iba sentong nung, tanga award atema osang magütsüdüng, Spike Lee-i 'Titane' film ajanga Palme d'Or takok anguba sangoktsü. Kasa mapang, Caleb Landry Jones-i

best actor award aser Norway star Renate Reinsve-i best actress award takok angu.

Haruki Murakami indang 'Drive My Car' ostü nung ajemdaker film yangluba atema, Japan nunger director Ryusuke Hamaguchi-i best screenplay award takok angu. Ano, Nadav Lapid 'Ahed's Knee' aser Apichatpong Weerasethakul indang 'Memoria' atema special jury award agütsü.

Lee den jury rongnung France-Senegal actor-director Mati Diop, American actor-filmmaker Maggie Gyllenhaal, Austrian director Jessica Hausner, French actor-helmer Melanie Laurent, Brazilian

helmer Kleber Mendonca Filho, French actor Tahar Rahim, South Korean actor Song Kang-ho aser cult French singer Mylene Farmer temi shilem agiogo.

Cannes sentong putiotsü nung mezüng award - Camera d'Or ka agütsütsü renem aser iba award ya Antoneta Alamat Kusijanovic indang 'Murina'-i takok angu.

* 2021 Cannes Festival nung takok angurtem:

- Palme d'Or: Titane
- Grand Prix: (tie) A Hero and Compartment No. 6
- Jury Prize: (tie): Aheds Knee and Memoria
- Best Actress: Renate Reinsve, The Worst Person in the World
- Best Actor: Caleb Landry Jones, Nitram
- Best Director: Leos Carax, Annette
- Best Screenplay: Ryusuke Hamaguchi, Drive My Car
- Camera d'Or: Murina by Antoneta Alamat Kusijanovic
- Short Film Palme d'Or: Tian Xia Wu Ya by Tang Yi
- Special Jury Mention for Short Film: Ceu de Agosto by Jasmin Tenucci
- Golden Eye Documentary Prize: 'A Night of Knowing Nothing', Payal Kapadia
- Queer Palm: 'The Divide'
- Jury Prize: "Great Freedom," Sebastian Meise
- Prize for Ensemble Performance: 'Bonne Mere', Hafsia Herzi
- Prize for Courage: 'La Civil', Teodora Ana Mihai
- Prize for Originality: 'Lamb', Valdimar Johannsson
- Special Mention: 'Prayers for the Stolen', Tatiana Huezo

Changtongya Town nung Sales Day ayongzük



Changtongya, Chiteni/July 18, 2021 (TYO): Livelihoods aser FNHW kübok Changtongya Block Level Federation den longjemer DAY-NSRLM, Block Mission Management Unit, Changtongya RD Block-i Honibarnü (17.07.2021) Changtongya Town local ground nung Exhibition cum Sales Day ayonga agiogo, ta sangdong ka ajanga metetdaksü.

Iba exhibition sentong nung,

Changtongya Block kübok yimtsüng 8 nungi mozü mamshi züsentetba süngolemba aser süngjanglijang balala bendena sayuogo. Alu nung mozü mamshi tsünüsembongtsü tem yokba inyakyim ajungketsütsü aser aluyimertem ajungmesotsü nükjidong nung iba sentong ayongzükä liasü.

Ano külen, tang ama Covid-19 tensa tamajungdang, nüburtemi temang nung teyari agütsüba chiyongtsütem alia achitsü ajungmesotsü asoshi iba

sentong agi. Tawa tanü, nüburtem pei pei kidang, mozü mamshi züsentetba süngolemba aser süngjanglijang tem akok tashi alidena achitsü asoshi tayongzükba tuluka ama kümdar. Ano, alu nungi züsentetba chiyongtsü tajung aika khen khenbo meyokteti shizüka dang yoker. Anungji, item ajak asadanga Exhibition cum Sales Day ayongzük, ta sangdong nung shia lir.

Iba Exhibition cum Sales Day nung aluyimertem züsentetba süngolemba aser süngjanglijang tajungtibatem shima senpet sen agütsüogo.

Maneni, iba sentong tenzüka Rev. Temshi, Pastor CTBA-i sarasademtsü. Iba exhibition nung tetendanger temji Dr. Intimongba Kichu M.O. CHC Changtongya, Putinungba Jamir Chairman, All Ward Union Changtongya Town aser Rongsennungla President, Changtongya Town Watsu Tentet liasü, ta kasa sangdong ajanga metetdaksü.

Pelaba Lemsateper

Tamang tongpang junga raraang, teti tatem makaba taküm, koba asoshi na aja aser kuliser jenti matsüngdang nai tenangzükba tajung agi, iba takümüji nai ametang. 1 Timoti 6:12.



15 May 1942 - 12 July 2021.

Ozü tsürabur tajung asür **IMSUNUNGSANG AIER** kinungertemi pa shiranga aliba mapang aser pa July 12, 2021 anogo nung iba lima nungi pilar onok timtem aser mangyim jashi nung alidang, kija-kibong, arogo, lokti, tembar-medemertem aser temeimertem shirnokisa sarasadem, nübo aser rongsen agi onok dang kanga meima yariogo, nenok ajak dang onoki kanga pelaba metetdaksür.

Ano, talisa Eden Medical Centre, Dimapur nung inyaker doctor aser nurse-tem ajak dang onoki kanga pelaba shisemer.

Nenoki onok dang aria bilema temeim sayuba mapatem ajak asoshi nenok ajak dang onoki kanga pelaba lemsateper. Tulusang Tsüngremi nenok ajak talubosa moajangma.

- Temeim kinungtsü, chirnur, anükapang aser semchirtem.

MULUNGNEN O

Lt. Chachensangla Ningsang (Chungtiayimsen)

Onoki teti meima aliba tsürabur tajung, asür **CHACHENSANGLA**, la shiranga aliba mapang aser asüba anogo tashi nung kija-kibong aser lokti tentet kwinangkati mulungsua nübo, rongsen aser shisatsü aser tamang sarasadem agi onok den yaritepogo, nenok ajak den onoki kanga pelaba lemsateper.

Nenok temeim mapa yari onoki kecha meyipa magütsütetaka, teyanglur Tsüngremi nenok taküm aser kibong tali moajangma ta ozü sarasadem.

~ Temeim kinungbo, Chirnur, Semchir, Anükapang & Kinungertem.



26:02:1943 - 13:07:2021



Dr. SC Jamir aser S. Imtiwabang Jamir na July 16, 2021 anogo nung Naga kin sobaliba aser asüng tarutsü Naga nunger yimten yimli onük kar dak ajemdaker Dr. SC Jamir kidang sensaksema amendang agiba noksa nung angur. (Dimapur, July 18, 2021)

Taliban lenirtemi...

(Tapak 8 nungi...)

Küm tem tsüngda Taliban puri Islam yimsü dak sendakba benjungbentsü balala amungba mapang rara anena atatsü asoshi sangdonga aruogo aser iba ajanga linük nung azütokshi tajemba kümdaksütsü ta timla agütsü.

Ajisüaaka tawa parnoki khen atema ceasefires benokba ya parnok sepaitem asüngsashitsü aser supply renemshitsü atema amshir ta shia aija arudar. Iba ajanga ceasefire tembangba sülen Afghanistan security forces asendenshir amaktsü asoshi parnok nem maongka

tali agütsür.

2001 küm September 11 nü US nung tongtibang tesem balala amakba sülen US-i anir linük balala nungi sepaitemi küm metsü shi Afghanistan nung telungpurtem samatsütsü asoshi raraan aruogo. Afghan forces tem parnoki tayimtsü agi teyari agütsüba medeni tashi meite akümsü ta tsübua bilemer aser iba ajanga Taliban nem linük ajunga amokbangdaksütsü mesera linük nung telok balala aika adoka civil war adoktsü akok ta tsübua bilemer.



Tokyo Olympics metenzük tsüngda Karoge yimti team-i India Archery team agizükba noksa nung angur.

South Africa football team nungi nisung 3 dak Covid-19 potet

Chiteni/July 18, 2021

(Agencies): Tokyo Olympic Games atema South Africa football squad nungi asayar Thabiso Monyane aser Kamohelo Mahlatsi na densema nisung asem dak COVID-19 tashidak potetba sangdongogo.

Brehostibarnü Japan den mezüngbuba asaya asayatsü atema renemshiba mapang video Analyst Mario Masha daka Tokyo tonga aruba sülen Covid tashidak potetogo.

"Camp nung onok rongnung nisung asem dak COVID-19 tashidak potetogo; asaya ana aser ketdangsur ka," ta team manager Mxolisi Sibam-i South African Football Association tenung nung Deobarnü osangbenertem dang ashi.

"Tashidak anogoshi tendangdar.. Masha aser

Monyane na temperature high aküm aser metzü tendangba positive potet aser iba sülen nasal test agi anir ao. Tia maka tena dak COVID-19 tashidak potetogo," ta pai ashi.

Paisa, team training agitsü atema temelaba mangu tashi quarantine süa atatsü aser Deobar anepdang tashidak tendangba result atadar, ta ashi.

"Iba tiamaka tatalokba ajanga yasüng onok mezüngbuba training session magitetsüsa aküm," ta pai ashi. South Africa mezüngbuba round nung Mexico aser France na dena asayatsü.

Kasa mapang nung Tokyo Olympics atema Australia athletics team ajunga Cairns nung parnok indang pre-Games training camp nung Honibarnü parnok indang takdangtem nung

quarantine asü.

Melbourne nungi aruba ketdangsur ka indang covid tashidak tendangba result mejangjaba sülen parnok quarantine asütsüsa aküm, ajisüaka tashidak tendangshiba sülen ketdangsur dak tashidak keta mali ta jangjaogo, ta Australian Olympic Committee (AOC)-i Deobarnü jangjashitsü.

Honibarnü teroto nungi nikonngtsütsü tashi asayartempei takdang nung dang kazüdaktsüba sülen warm-up asayatem nung tokteptsü atema temelaba agütsüogo.

Ketdangsur shiba indang test result mejangjai liasü, pa anaben tashi tashidak tendangba sülen tashidak keta mali ta jangjaogo saka team nung maden tsüngda pa ano tashidak tendangshitsü.

Tokyo Olympic Village nung nisung ka dak Covid-19 putet

Tokyo, Chiteni/July 18, 2021

(Agencies): Alima ajunga asüngba coronavirus wara ajanga anogo atsülanga aruba Olympics tenzüktsü asoshi sentong tem renemba mapang ka nung, Honibarnü, Tokyo Olympics achayangertemi Games Village nung mezüng Covid-19 positive putetba osang sangoktsü.

Iba asayamung lapokba sentong tenzüktsü anogo trok lia, asayamung ayongertemi ashiba agi, Games Village, kong athlete aser ketdangsur meyisa meyi anenzuktsü renema lir, iba tesem nung nisung ka dak coronavirus tashidak putetogo.

"Screening test agiba mapang, iba Village nung mezüng Covid-19 putetba osang angazük," ta osangbener den jembiba mapang, Tokyo organising committee atema otongdar Masa Takaya-i ashi.

"Tang, iba nisungba ya hotel takdang balaka nung

anepaludar," ta Takaya-i ashi.

Japan nung osangbener sangdong ajanga angazükba agi, iba Games Village nung Covid-19 tashidak putetba nisung ya bendanglen nungi lir. Japan nung Covid wara tasen adoktsü tetsübu nung, nüburtemi iba Games thitsütsü asoshi longkak aitar.

Tokyo 2020 Games, Chief, Seiko Hashimoto-i, Games Village nung athlete aser staff tsüngda iba wara menatepa ora, tensa achayangtsü asoshi asayamung ayongertem renema dang lir.

"Covid-19 wara prokba nokdangtsü asoshi, onoki akok tashi mera tapet agia inyakdar. Village telungtet nung Covid puteter timba kümra, tensa azüoktsü asoshi onoki sentong renema tajungtiba nung achayangtsü," ta lai ashi.

Hashimoto-i, küm ka tashi thitema aruba asayamung nung shilem agitsüpur tem iba wara

tena ajanga tsübuseta alitsü, ta ashi aser lai asayamung ayongertem dang iba tashidak putetba osang meimbanga mayutsü asoshi mepishio.

"Olympics nung shilem agitsü asoshi Tokyo tonga arur ahlete tem kanga shisabulua alitsü. Parnok timtem ni angateter. Ibayongji, tashidak puteba osang meimbanga meyui metetdaksütsü nüngdak," ta lai ashi.

Tokyo 2020 CEO Toshiro Muto-i, Covid-19 tashidak putetba nisung ya vaccine agi/magi osang mejangjateti lir, ta ashi.

"Nisungba yagi Covid-19 atema vaccine agia lir asüng magiar, ano osang kecha mangazük," ta Muto-i ashi.

Muto-i ashiba agi, iba Games nung shilem agitsüpur athlete ajak anogoshia tendangtsü. Ajasünungang, parnok rongnung ka danga iba tashidak aliba putetra, pa/la quarantine' asütsü.

India domestic boxing taruba ita tenzüktsü

New Delhi, Chiteni/July 18 (Agencies): Küm ka dak tema asayamung ka danga ayongzuka masayai arur national youth aser junior boxing championships asayaa India domestic asayamungtem tenzükshitsü, ta BFI-i Honibarnü metetdaksü.

Youth men aser women national championships pezübuba July 18 nungi 23 tashi asayatsü aser junior boys national championships tasembuba aser junior girls championships pezübuba July 26 nungi 31 tashi asayatsü.

Item asayamungtem ya taruba ASBC Youth & Junior Boxing Championships atema asayartem shimba asayamungtem asütsü. Iba asayamung ya Delhi Public School (DPS), Sonapat nung asayatsü.

"Wara poktetba ajanga küm ka dak tema domestic asayamungtem ayongzuka

masayaba ajanga asayartem kanga timtemtepa aruogo. Ajisüaka tensa tajungba kümogo aser iba ajanga asaya tenzükshitsü atema temulunglema bilemer," ta Boxing Federation of India (BFI) tir Ajay Singh-i ashi.

Ladakh, aser Services Sports Control Board densema state aser UT units 34 nungi Nationals Championships nung shilem agitsü imlar.

Youth event nung tebur 300 dak tema aser tetsür 200 dak temai shilem agitsü imlar.

Youth boxing nationals tatemsabuba 2019 küm June ita asaya aser Services Sports Control Board aser Haryana na tetsür aser tebur jenjang nung overall champions liasü.

Wara ajanga alima ajunga dak mekongshi tsüngda junior women's nationals asayamung nung Haryana temaba jenjang nung tembanga liasü.

ICC T20 World Cup 2021: Group stage nung India aser Pakistan asayatsü

Dubai, Chiteni/July 18, 2021

(Agencies): Hokolbarnü, ICC ajanga sangdongba pool nung T20 World Cup atema kasa group nung India aser Pakistan dena lir.

T20 World Cup asayamung ya UAE aser Oman nung October 17 nungi tenzuka November 14, 2021 tashi asayatsü. Afghanistan aser World Test Championship takok angur New Zealand team den Group 2 nung India aser Pakistan lezmüktsüogo.

Group 1 nung taoba T20 World Cup takok angur telok West Indies, England, Australia aser South Africa dena lir.

Super 12s indang Group tem March 20, 2021 nü sangdongba team ranking nung ajemdaker shimogo, ta International Cricket Council sangdong ka ajanga metetdaksü.

Qualifying round nungi group shia nung team ana adentsü. Mezüng round nung, automatic qualifier - Sri Lanka aser Bangladesh densema, team trok, shirnok ICC men's T20 World Cup Qualifier 2019 ajanga temsüa aküm, parnok team 8 tashi tokteptsü.

Group A nung Ireland, Netherlands aser Namibia team temi Sri Lanka den

adentsü. Kasa mapang, Oman, PNG aser Scotland team temi Group B nung Bangladesh den asayatsü.

Mezüngbo, iba asayamung India nung ayonga asayatsü renem, saka linük nung coronavirus wara tasembuba (third wave) adoktsü asadangteta, iba asayamung linük tangai belenadok.

2016 küm, Kolkata kübok ayongba kasa asayamung final nung West Indies-i England tsükdaksür külen nungi, taküm T20 World Cup ya mezüng asütsü.

"Oman Cricket tenzükter mapang talangka aruogo aser tanü ICC den BCCI longjemer Oman Cricket Academy nung ICC men's T20 World Cup group ayongzüktsü sangdongba ya otsü asütsü," ta Oman Cricket chairman, Pankaj Khimji-i ashi.

*** Round 1**
Group A: Sri Lanka, Ireland, the Netherlands, Namibia
Group B: Bangladesh, Scotland, Papua New Guinea, Oman

Super 12s
Group 1: England, Australia, South Africa, West Indies, A1, B2.

Group 2: India, Pakistan, New Zealand, Afghanistan, A2, B1.

BILEMDANGANG

"Pei shisatsü mazüoktetertemi aiben lendong ajurur."